

মোফাজ্জল হায়দার চৌধুরী রচনাবলী

সুনীলকুমার মুখোপাধ্যায়

আমাদের সাংস্কৃতিক অঙ্গনে পঞ্চাশের দশক ছিল যাকে বলে আবর্তসঙ্কুল ও উন্মিষুখর। সে দশকেই আমাদের চিন্তা-চেতনার ক্ষেত্রে অত্যন্ত সূত্র মানবতাবাদী দৃষ্টিভঙ্গী নিয়ে আবির্ভূত হয়েছিলেন মোফাজ্জল হায়দার চৌধুরী। সাম্প্রদায়িক রাজনীতির হলাহল সেদিন আমাদের সামগ্রিক জীবনধারাকে যেভাবে বিষিয়ে তুলেছিল, তাতে মোফাজ্জল হায়দার চৌধুরীর মত বিবেকবান মানুষের আতংকিত না হয়ে পারেন নি। নির্বাক জীবন যাপনে অভ্যস্ত, স্বল্পভাষী মোফাজ্জল হায়দার সেদিন বিবেকের আহ্বানেই যেন বলিষ্ঠ প্রতিবাদী আওয়াজ তুলে মানুষকে সর্বনাশের পথ থেকে নিবৃত্ত করতে এগিয়ে এসেছিলেন। ফলে অজাতশত্রু মোফাজ্জল হায়দারেরও শত্রু জন্মা হল। তিনি অনেকের বিষ নজরে পড়লেন। তবু অকুতোভয় মোফাজ্জল হায়দার তার বিবেকের বাণী উচ্চারণ করে যেতে কখনোই দ্বিধাগ্রস্ত বোধ করেননি। পঞ্চাশ, উত্তাল দশক পেরিয়ে তিনি সত্তরের দশকের সূচনা পর্যন্ত অক্লান্তভাবে একজন crusader-এর ন্যায় লড়ে গিয়েছেন সকল প্রকার সংকীর্ণতা, অনুদারতা ও উন্মত্ততার বিরুদ্ধে। অবশেষে আততায়ীর হাতে প্রাণ দিয়ে আপন কর্মকাণ্ডের সার্থকতা প্রত্নিপন্ন করে গেলেন।

প্রচার বিষুখ, সদা বিনম্র মানুষ মোফাজ্জল হায়দার চৌধুরী প্রকৃতই ছিলেন সত্যের একটি দীপশিখা, শত অন্ধকারের বুক চিরে যা নিজের পথ চিনে নিতে জানত। ছাত্র জীবনে অসামান্য কৃতিত্বের অধিকারী মোফাজ্জল হায়দার কোনদিনই ঐশ্বর্য বিলাসের স্বপ্ন দেখেন নি—তবু তিনি স্নন্দরের স্বপ্ন দেখতে ভালোবাসতেন। শান্তিনিকেতনের শিক্ষা তাঁকে ঐ প্রতিষ্ঠানের মহাস্বপতি রবীন্দ্রনাথের প্রশান্ত-উদার জীবনমন্ত্রে উজ্জীবিত করেছিল অনেকখানি। সে শিক্ষার ঋণশোধ করতেই যেন আপনার চারপাশের অন্ধকারের বিরুদ্ধে লড়াই শুরু করেছিলেন তিনি। শিক্ষাব্রত জীবনের সার করে নিয়ে ঢাকা বিশ্ব-বিদ্যালয়ে পদার্পণের সুহূর্ত থেকেই তিনি অবতীর্ণ হয়েছিলেন এক সংগ্রামীর ভূমিকায়। কখনই খণ্ড সোচ্চার ছিলেন না হয়তো; কিন্তু ধীরে, সবিনয়ে দৃঢ়ভাবে সকল রকম মতচার বিরুদ্ধে লেখনী চালিয়ে গিয়েছিলেন তিনি। পেশাগত কারণেই বিভিন্ন সময়ে তিনি নানা ধরনের সৃষ্টিকর্মেও মনোযোগ দিয়েছিলেন, তা ঠিক। তবু স্বীকার করতে হয়, মোফাজ্জল হায়দার সৃষ্টিকর্মে সফল হওয়ার চেয়েও, বেশী মনোযোগী হয়ে পড়েছিলেন জাতি, সমাজ ওথা দেশের মনের অর্গল খুলে দিতে। তাই মোফাজ্জল হায়দার কত বড় লেখক ছিলেন সে ভাবনা আমাদের মনে দেখা না দিলেও, তিনি যে কত বড় মানুষ ছিলেন, তা নিয়ে সত্তরের দশকের আগেই আমরা ভাবতে শুরু করেছিলাম।

একাত্তরের শেষ লগ্নে পাকিস্তানী দুঃশাসকরা তাঁকে হত্যা করে তাঁর প্রবল আদর্শবাদী মানবসত্তাটিকেই প্রোজ্জ্বল করে রেখে গিয়েছেন। শহীদের মৃত্যুর মধ্য দিয়ে মোফাজ্জল হায়দার আপন জীবনস্বপ্নকে চরিতার্থ করে গিয়েছেন।

মোফাজ্জল হায়দার চৌধুরী রচনাবলী ॥ (প্রথম খণ্ড) ॥ মোহাম্মদ মনিরুজ্জামান সংকলিত ও সম্পাদিত ॥
প্রকাশক : বাংলা একাডেমী, ঢাকা। প্রথম সংস্করণ, ১৩৮৫-১৯৭৮ মূল্য : পঞ্চাশ টাকা মাত্র।